

鄉土志業編

張國淦著



臺灣省立圖書館藏書
類目 D631 /
登錄號 213.12 . 6

寧羌州鄉土志目錄

歷史

建置沿革

政績錄

兵事錄

耆舊錄

節烈

人類

戶口

氏族

宗教

實業

一

一

四

九

一五

二二

二二

二三

二五

二五

地理

境界

二五

區劃

二五

山脉

三二

水誌

三四

道路

三七

物產

三八

商務

三九

寧羌州鄉土志

漢中府寧羌州知州陳芑芬督輯

教員附生黎彩彰採輯

歷史

建置沿革

本州建衛在明代之初其先稱羊鹿坪禹貢梁州之域也周以前為氐羌所據春秋戰國時白馬氏據其西境蜀據其東境秦并蜀置蜀郡全境屬焉漢初分置廣漢郡地屬葭萌縣武帝元鼎六年平南夷以廣漢西白馬故地置武都郡遂分屬於沮縣後漢建安二十三年蜀先主改屬梓潼郡漢壽縣晉及後魏屬晉壽縣隨屬義成郡縣唐武德四年析縣谷置三泉縣兼置南安州及嘉牟縣尋廢州及嘉牟而以縣屬利州天寶元年改屬漢中郡宋乾德五年以縣直隸京師至道元年建為大安軍屬利州路元初為大安州至元二十年降為大安縣屬沔州又

省三泉入之明洪武二十九年僧人田九成據馬面山卽龍頭山作亂太祖命將討平之明年遣指揮姜觀建寧羌衛省大安縣至成化二十九年增建州治於衛南領沔略二縣崇禎時解所領以州隸漢中府 本朝因之自 國初至今未有所變更

政績錄

本州未建置以前寄隸他郡政績無攷自改建州治後始稍稍有可稱述而舊志散佚缺略太多又不能盡載其事蹟故於興利去害聽訟諸大端亦幾無實事可徵茲就聞見所及特述其大略如左

興利

明

張簡江西弋陽舉人宏治初蒞州時草昧初開諸多未備公悉心經理百務並興凡州治一切建築多創始於此又循五丁舊蹟鑿山通道蠶叢大闢

謝豸山西蒲州舉人正德中蒞州時藍鄙之亂甫平邑里蕭條人心浮動公能持

廉節費愛養拊循作士勸農鋤強扶弱爲一時循良之冠

李應元四川雅州舉人嘉靖初蒞州以山民不知水利特鑿七里堰引水灌田千餘畝獲利甚饒民自是爭相仿效凡山間平地有水之處概成良田

盧大謨直隸永平舉人萬歷中蒞州修舉廢墜不遺餘力尤加意津梁嘗建大安橋以惠行旅

國朝

李楷江南長洲舉人康熙初蒞州時天下新定又值吳逆之變擾攘頻年公興學校重民務盡心撫字民以稍寧

劉榮山東諸城進士乾隆九年由湖南長沙縣陞任至州值歲大饑開倉賑濟不待報可嘗以山地磽确鮮有人耕而歲賦正供額浮於地請核實裁減事得施行又教民因山畜蠶授以縑織之法民賴其利呼爲劉公繭後陞四川布政使入祀名宦並有專祠祀之

鄭緒章江蘇吳縣舉人嘉慶十七年蒞州銳意興學教養兼施常建振文書院與

諸生講學其中歷寒暑不輟所著有居業錄續書摘要錄若干卷餉遺後學惜不傳

張廷槐四川奉節人道光十年蒞州盡心民事常於棧道左右植桑萬株皆捐俸爲之又勸民種麥以濟春食並請出借穀石爲補助之計民至今稱之

李修德山西解州人光緒五年蒞州以州北玉帶河巨浸瀾漫夏秋盛漲民多病涉乃倡建鐵索橋於河上親臨監督規製宏廠兼置有歲修常款以時葺治行人永便

去害

明

梁成四川巴縣舉人宏治初蒞州認真吏治法令嚴明一時奸吏猾胥豪暴之徒屏息斂迹政簡刑清

陳放直隸寧國舉人亦宏治間任時有山賊竊發竄擾至州孤壘無援勢甚岌岌公竭力堅守卒退賊兵民服其勇

鍾湛靈山西澤州舉人隆慶間蒞州以里甲相沿日久弊竇叢生吏得因緣爲奸侵漁鄉里乃更省之積弊盡除民頌其德

國朝

劉應祥湖南新化人咸豐六年以進士知州事適州西有布商李姓聚衆與回民賽氏爲難戕其一家因官捕逮甚急遂保聚山間大吏發兵勦之公聞止兵境上親往諭以利害衆散李就捕民皆安堵獲免於兵

楊吉雲湖北鄖西人同治四年蒞州時髮捻初靖游匪散兵相屬於路竊境適當川口煩擾尤甚公乃盡法懲治不稍假借邑境以清

陳景修福建閩縣人同治七年蒞州以惡役藉端生事魚肉鄉民特治其最豪暴者一人闔境肅然差風爲之稍戢

何福奎山西靈石人光緒元年蒞州三年全秦大饑州民嗷嗷待哺公設法賑濟全活甚多又捐置義倉穀一千六百餘石爲永久之備後任繼之共捐穀六千三百餘石民食攸資

聽訟

明

王儒山西澤州舉人嘉靖初蒞州清廉耿介勸學愛民民有訴訟者公以情理諭解之使兩造俱服而退

甯笏河南河內舉人萬歷初蒞州吏事精敏剖判如流有疑獄數年不結公一訊即得其情民無枉者

國朝

趙燾山東膠州進士順治中蒞州清儉和易惠愛士民尤慎於讞獄每慮囚矜恤周至冤抑獲伸

劉懋功山東膠州進士幼聰慧人稱神童咸豐十一年蒞州精明果斷人莫能欺每聽訟虛心研問務盡其情而禁吏役多言有犯者輒重懲不貸民皆服之

金玉麟四川巴州人同治二年以翰林散館知州事慈惠廉明勤於聽受民無不達之隱後髮逆陷城死於難賊將其屍特爲具棺以斂且張僞檄於櫬上大書此

係陝西好官該士民應將其靈柩好爲照護妥送回籍云

羅驥四川丹陵人同治十年蒞州振興學校勸課農桑孜孜焉惟恐不及尤善聽斷發奸摘伏如神而廉不受私居二年吏無訛法人無遁情士民共德之爲立清官坊以頌其美

此外於明有方世讓湖廣巴陵舉人嘉靖初蒞州持躬清介銳意好士州務一新王一鳴山東齊東舉人嘉靖中蒞州政宗大體濟以嚴明尤敬禮賢士遷長史有去思碑 胡之甯湖廣人萬歷中蒞州有惠政民曾立祠祀之 熊嶽秀河南舉人亦萬歷間任興學養士造就多方

國朝

康熙間有裘龍杭州人清廉耿介慈愛使民以誑誤去士民冤之

兵事錄

本境據秦蜀要害右控階文左倚漢沔爲自古用兵必爭之地而山深箐密地勢險固又時有寇盜出沒其間故自秦漢至今西南有事則甯首當其衝誠兵事上

之要地也茲舉其最著者分述於後

秦王滅蜀

秦自春秋之季漸略地至漢中并通蜀厲共公二年蜀人來賂二十六年命左庶長城南鄭二十八年南鄭叛歸蜀惠公十三年仍伐蜀取南鄭惠文君元年蜀人來朝九年遣張儀司馬錯伐蜀滅之初王欲伐蜀苦無道乃作五石牛以金置尾下言能糞金蜀王負力而貪令五丁開道引之秦以兵隨其後遂滅蜀（今自沔縣西南至四川之大劍關口統謂之金牛道而州北四十五里有五丁山即五丁當日開道之處）

蜀魏之爭

蜀先主與魏爭漢中自葭萌東出陽平關（在今沔縣境）擊破魏兵後主時武侯數北伐屯兵漢中俱取道於此延熙十四年大將軍費禕駐漢壽景耀元年姜維建議以漢中兵退屯漢壽爲誘敵深入之計六年魏大舉伐蜀鄧艾從間道出陰平鍾會由駱谷至漢中攻陽安關口（即陽平關）蔣舒開城出降傅僉格鬪

而死維遣張翼董厥詣陽安至漢壽聞關城已破退保劍閣會遂長驅入蜀

南北之爭

南齊高帝元年晉壽民李烏奴與白水氏寇梁州（即漢中府）刺史范柏年說降之及朝廷遣王元邈代柏年詔與烏奴俱下烏奴勸柏年不受代柏年計未決或譖於齊主誘殺柏年烏奴遂復叛引氏兵爲寇王元邈誘擊破之明帝建武四年魏以氏帥楊靈珍爲南梁州刺史靈珍舉州降齊襲魏武興（魏置故址在略陽縣南）王楊集始據其城及魏克武興靈珍奔漢中梁武帝大同元年鄱陽王範刺史樊文熾合兵圍晉壽魏東益州（魏置即武興）刺史傅敬和降沔縣諸地遂盡入南朝

王建之興

唐僖宗光啓元年王建扈蹕至興元（即漢中府）有功詔帥所部兵戍三泉（故址在州東北）遙領壁州（唐置今四川保寧府通江縣）刺史尋授利州（今四川廣元縣）周庠說建曰唐祚將終藩鎮互相吞噬皆無雄材遠略不能勤

濟多難公勇而有謀得士卒心立大功者非公而誰然葭萌四戰之地難以久安
閬州地僻人富刺史楊茂實不修職貢若表其罪興兵討之可一戰而擒也建從
之召募溪洞豪有衆八千沿嘉陵江（在州西）而下襲據閬州後遂併有全
蜀

宋之平宋

宋太祖乾德二年命王全斌伐蜀由鳳州路進討下興州（今略陽縣）進軍三
泉敗蜀兵數萬擒僞招討使韓保正副使李進獲糧三十萬斛既而崔彥進康延
澤等逐蜀兵過三泉遂至嘉陵江殺虜甚衆

金人侵蜀

高宗紹興三年金人破饒風關（在興安石泉縣）入興元經略使劉子羽退保
三泉金人復深入至金牛鎮（在州東北）蜀中大震子羽以潭毒山（在今大
安鎮東北）形斗拔其上寬平有水乃築壘守之儲粟十餘萬石盡徙將士家屬
棚中積石數十百萬下臨蜀道敵至距營十數里子羽據胡牀坐壘口諸將泣告

曰此非待制坐處子羽曰子羽今日死於此金人尋亦引去初子羽至三泉從兵
不滿三百與士卒取草芽木甲食之遺書邀吳玠共守三泉玠至不果留張浚欲
移守潼川（今四川潼川府）子羽遺書力言已在此敵必不敢南浚乃止及金
人北去子羽復遣兵追擊大破之蜀竟獲全

吳曦之叛

寧宗開禧三年吳曦獻階成和鳳四州於金求封蜀王據興州以叛馳檄招
大安軍（即今大安鎮）楊震仲震仲辭疾不行謂軍教授史次秦曰大安曰武
興而來爲西蜀第一州若首從其招則諸郡風靡矣願力不能拒義死之曦遣吳
鵬飛代震仲趨其行益急震仲遂仰藥死初曦叛四州之民不願臣金棄田宅推
老稚順嘉陵而下過大安軍震仲計口給粟境內無餒死者曦盡驅驚移之民使
還皆不肯行或赴江以死迨曦敗四州皆復嘉定十二年金人復侵四州入興元
至大安軍沔州（今沔縣）都統張威遣統制石宣邀擊大破之殲其精兵三千
人俘其將巴圖魯安金人乃遁去

蒙古入蜀

理宗寶慶三年蒙古入沔州進軍金牛至大安又分兵自嘉陵江木皮口突出何進軍後進戰敗死之曹友聞與弟萬從間道邀擊蒙古兵始退端平二年蒙古自鳳州入擣西池谷距沔九十里吏民議退保大安知州事高稼言於制置使趙彥呐曰今日之事有進無退若能進據險地以身捍蜀敵有後顧必不深入若倉皇召兵退守內地敵長驅而前蜀事去矣彥呐曰吾志也已而竟行留稼守沔蒙古自白水關（在州西南接四川昭化縣境）入六股株（在沔縣西）陷沔州稼死彥呐至蜀口聞沔州破乃進屯青野原蒙古圍之友聞曰青野爲蜀咽喉不可緩遣萬自冷水口渡嘉陵江至六股株夜銜枚由間道直趨青野原力戰友聞引精兵亦趨至原下圍遂解旣而蒙古先鋒汪世顯擣大安友聞又救之指磨甫畢蒙古大軍數萬突至友聞逆戰又敗之敵乃退明年蒙古兵大集陷興元欲衝大安軍彥呐檄友聞控制大安以保蜀口友聞曰大安地勢平曠無險可守正敵騎所長步兵所短况衆寡不敵豈可於平地控禦彥呐不從友聞遂戰死於陽平關

（在州東北）軍盡沒蒙古兵遂長驅入蜀

明取漢中

太祖洪武三年大將軍徐達擣安定（今鞏昌府）遂自秦州南傅友德領前鋒出徽縣奪略陽關入沔州別將由連雲棧合攻漢中克之留金興旺鎮守已而蜀兵出金牛寇漢中傅友德還兵救卻之及太祖命友德伐蜀諭之曰蜀人聞我師西伐必北阻金牛若出不意直擣階文門戶旣隳腹心必潰友德依其言遂取蜀

高福興之叛

明太祖洪武三十年沔縣吏高福興及縣民田九成等謀爲亂教諭王樸知之言於衛衛發兵捕之次陽平關賊大集逆戰官軍敗賊遂入略陽殺知縣呂昌焚徽州殺學正顏敘彬陝蜀番民皆響應帝命長興侯耿炳文討之炳文駐文縣遣將分道追勦兵至漢中之後河（今州南有後河壩）擒福興九成等據馬面山（在州東南卽龍頭山）移兵破之並獲其黨四千餘人詔誅其同謀者脅從勿治

藍鄙之亂

武宗正德四年保寧賊藍廷瑞自稱順天王鄆本恕自稱刮地王糾其黨方四馬六兒廖麻子等擁衆數萬爲四川巡撫林俊所敗遂自南江縣越大巴山入漢中屠戮西鄉略陽沔利城亦不守漢中都指揮金冕圍之時陝西巡撫藍章方駐漢廷瑞遣其黨何虎詣章乞還川就撫章令冕護之出境廷瑞旣入川剽如故總制洪鐘設計誘擒之餘賊散走又累年亂乃定

明季流寇之亂

莊烈帝崇禎六年流寇自夔州入四川西破廣元所在告急七年賊趨漢中三邊總制洪承疇將北行至棧道青橋驛聞川賊數萬營寧羌乃返至沔州援之賊由陽平關渡河奔鞏昌八年賊由漢中陷寧羌知州周應泰及指揮同知王履泰鎮撫曹雲梯皆死之十年李自成與過天星自秦州入蜀復陷寧羌指揮徐大行被執不屈而死賊遂破七盤關至成都

削平蜀寇

國朝

康熙二年西安將軍傅喀禪副都統杜敏等進勦蜀寇師次陳家坡奮勇勦殺賊遁入天池寨（即天池山在州東北）敏等追勦賊首劉二虎勢窮自縊郝搖旂袁宗第夜遁敏等復追至黃草坡大敗之擒搖旂宗第並僞晉王朱宗漢等餘寇悉平

吳逆之變

康熙十二年吳三桂據雲南反四川巡撫羅森等叛降賊分道寇漢中踞陽平關十三年三月西安將軍瓦爾喀等率兵自野狐嶺直抵陽平擒斬賊衆數千陽平復五月都統赫業等復自漢中抵七盤關大破賊衆於關口及種子鋪山下進取朝天關九月僞將軍何德成自昭化赴二郎關（在廣元縣南五里）欲截糧餉官兵擊敗之擒僞都司賀騰龍十月參將陳應奎夜襲賊營於寧羌賊衆大亂遁回南山尋復劫略陽糧艘據七盤朝天諸關窺伺陽平上命經略莫洛等回兵漢中固守陽平等處俟殲除寧羌諸賊再圖恢復莫洛等遂駐兵寧羌營南教場十二月提督王輔臣兵叛猝攻經略營滿兵盡力射卻之已而輔臣自督戰礮矢

齊發莫洛遂遇害輔臣率叛兵攻沔大將軍貝勒董額退保漢中十八年提督趙良棟與王進寶分道入蜀良棟自徽縣復略陽分遣裨將趨陽平關徇沔縣進寶亦復鳳縣定漢中會兵甯羌進取四川

教匪之亂

嘉慶二年教匪齊王氏姚之富竄甯羌山中參贊德楞泰督師進勦駐教場壩賊屯東山寺奮擊破之追至天台山賊由二郎壩遁入川六年匪黨高三馬五在鐵鎖關一帶焚掠提督楊遇春擊賊大捷擒高三馬五敗死餘衆逃散十九年賊首龔貴由黃官嶺（在褒城縣）繞鐵鎖關至大安鎮沿途殺掠遊擊林向榮率兵追擊之賊由導嶺溝竄入略陽

髮逆之變

同治二年偽啓王梁成富連破漢南各州縣諸軍失利賊謀入川蜀軍統領黃鼎駐梨坪遏新集黃官嶺入川之路賊不得逞遂由胡家壩西入鐵鎖關至州東屯山上時州兵寡弱民無固志多逃匿山寨城中惟老弱及官弁猝見賊至盡失色

亡者相繼弁目徐正芳獨率數十人奮勇出戰賊圍殺之尋陷城知州金玉麟死於南門士民殉難者亦甚衆

耆舊錄

本境僻處山南開化最晚唐宋以上與蠻夷雜處者數千年自近代改置州郡文化漸開而山國之民知識固陋聞見狹隘以云質樸勇敢則有之若與語宏達之事業精深之學問則實遜謝未遑焉然老成厚德懿行嘉言足以爲後學勸者亦正不少茲述如左

事業

明

劉炎性仁孝宏治間以明經宦大同歎曰與其離親受祿曷若菽水承歡遂乞養歸康狀元海爲文贈之

謝思道性廉介舉人同知夔州府立心鯁直人呼謝青天

王良臣舉人督餉九門才能大著出守澍江遷運使所至有聲

傅汝礪進士知彰德府地當衝要游刃有餘以清廉特著

景承芳進士官山西副使有惠政歸鑿渠大興水利鄉里賴之

葉期化舉人爲汾州司理敏於聽訟寃獄一清

王致中良臣之孫進士官兵部主政出爲太原司理以清直觸忌謫河南知事陞靈寶知縣拯困起衰救荒卹驛靈民感懷

劉廷謨進士由兵部郎中出守大名歷山西參政所至有赫赫名居鄉條陳利弊梓里有碑

王彥葵致中子舉人父亡年十五哀毀如禮事母蘇宜人能以色養於弟則以產讓於女弟則厚賞嫁之皆人所難也因親老不上公車者三十年後爲夏縣尹燭照民隱歷錦衣衛經歷

國朝

侯維垣少失怙恃祖母羸鞠養之垣能盡孝州牧張旌日報劉日短垣之子若孫均有聲庠序能守家學

高可權庠生家素裕好施與族黨貧乏者婚喪咸有助設館延師教鄉子弟歲歉貸粟以濟人急子秉直秉哲能繼其志直子尙瑞哲子尙賢俱爲邑名諸生

王秉聰與弟秉濬俱舉人父早亡母堅志撫孤聰濬幼讀手不釋卷同歲游庠逾年復同領鄉薦濬任四川清溪縣知縣有惠政聰銓教職勤於訓課至今人尙稱之

龍有雲舉人幼聰敏知友愛學邃品端遊其門者至今奉爲典型

李天培庠生號三植性好友亢直不阿同學推重之治家甚嚴子弟皆循循守禮或以武功顯或以文學稱爲邑望族

杜學曾性敦孝友睦和鄉里五世共爨遭賊被執脅之不降夜殺守者逃歸

王瀛武生品端能幹事當道無不重其人有過客莊龍驟病卒於大安旅舍瀛爲經紀其喪所留衣物代藏之數年不遺寸縷後龍族人莊振知府事欲歸其櫬感瀛之義給忠信可風匾額旌表其門

周倬恩貢生爲人質直學博善教孝友無間言壽七十三

黎長卿歲貢生性敦厚學業宏通事親以孝訓徒有法舉鄉飲大賓壽七十一
王開禮恩貢生爲人誠篤性寬生平不肯以疾言遽色加人人或犯之亦弗校尤
好施與嘗有竊盜入室登樓爲所覺佯不知俟家人安寢引賊自樓下給以錢米
賊懼不敢受固與之使尋生理賊由此愧悔爲良民其厚德如此幼嗜讀至老不
倦日手經籍學使累旌以匾額有風追衛武士林樹楷之稱壽九十二
李朝宗事親孝教弟成名四世同居子若孫俱入膠庠學使馬給以菊泉風古匾
額壽八十八

趙瑞與弟琛四世同居友于甚篤恭敬孝慈和睦宗族濟鄰里之急卹鰥寡之苦
州牧累表其門有古道猶存漢濱遺老匾額俱享高壽瑞年九十有四琛年九十
有一

閔粟貢生品端學優教徒成立者百餘人官同州訓導

周長發武生賦性正直濟貧拯急常如不及州中習武者多出其門其教先以禮
讓爲本雖武弟子皆彬彬儒雅學使陸給以材育干城匾額

王朝輔歲貢生教匪犯境率勇禦賊議敘六品頂戴歷任甘肅大通縣訓導
魏超賊犯黃壩驛率勇堵禦爲賊所執脅降不屈斷左臂割左耳昏絕未死大守
重賞之給蹈刃成義匾額

李篤生天培之姪嘉慶初以武生投効軍營平河南滑城匪積功至五品後以武
舉從楊忠武公征張格爾賊竄鐵蓋山負隅自固篤生謂同官曰不入虎穴焉得
虎子我輩受國家豢養恩以身許國畏死非夫也請於帥得饒將七人從山左緣
壁上夜深奮勇格殺大呼曰官軍至矣賊衆驚潰遂乘間縛張格爾以獻凱還六
人皆不次超遷篤生獨阻上聞時論惜之

李國瀛進士篤生之子以父建奇勳未蒙上賞發憤自勵遂成名授山西知縣歷
任五寨平遙榮河定襄榆社洪崖諸要區皆有政聲丁內艱歸再起爲洪銅令適
捻匪大股犯城極力守禦家人亦遣登陣賊環攻無隙乃遁以衛城功陞知府旋
卒其生平博極羣書勤於爲政事無鉅細不假之人嘗語人爲治當嚴東家丁無
信吏役使官民一氣相通宰榆社時民多不學因取小學幼儀諸書日爲講說期

年翕然向風歲飢不待憲議遽開倉賑濟又除榮河錢糧積弊令五寨民畜牧植桑化瘠苦爲膏腴皆政績之卓著者學使趙曾爲傳以述之

王曰奉由軍功薦保藍翎把總署鐵鎖關汎外委髮逆之變率營兵民團赴大峽石礮子等處堵禦戰敗受重傷三十八處絕而復甦人稱其勇

蒲尙珍優增生性耿介守正不阿事繼母以孝訓子弟嚴而有禮鄉里咸欽重之雖極粗暴者一見皆肅然起容邑宰每延見敬禮有加數典大工無毫髮私學使給忠信篤敬匾額以旌之壽七十

熊占峯優生立品端方居心正直州牧楊給端人正士匾額以旌之壽八十二

胡長祿武生語言慎重舉止端詳性好施與棺木義塚塚道路橋梁諸義舉皆竭力出貲營辦壽七十二州牧旌以品潔行優急公尙義匾額

封圻庠生幼失怙事母以孝聞母治家嚴圻雖年逾不惑猶時受扑責跪受之餘惋愉承歡必母怒解而後已母病親侍湯藥寢食俱廢延醫千里之外母死憂鬱成疾未幾亦卒生時好爲善舉州牧張曾給以尙義好施匾額

馬振德太學生幼失怙母素多病奉侍湯藥數十年無稍懈母沒與兄振魁友恭相濟不忍效析炊惡俗同室怡怡鄉鄰景慕學使許給以孝友著聞匾額

何炳辰恩貢生性嚴正博學篤行醫傳三世活人甚多壽九十

趙元升守正不阿力行善舉嘗捐金鑿廣坪河險路三十餘里

杜廉監生爲人正直慷慨樂施年近古稀無疾而死

馬得寶性孝友尤善施予壽八十五終

金聯陞品行端方輕財好義凡戚友婚嫁喪葬之事無不解囊相助屢施地畝建義塚年逾五旬始舉四子壽八十無疾而終

趙邦驥廩生母曹氏早卒驥撫弟慰親克敦孝友事繼母尤盡禮教人先器識而後文藝成就甚多選貢後不樂仕進其弟邦駿亦歲貢生能文善書與兄友恭相濟動止不離頗有伯康溫公之風學使許校士漢南稱之

張廷獻貢生制行不苟學問甚優生平以授徒爲業州城佳士半出其門壽八十二

其二其弟廷培亦貢生品端學粹教授終身壽七十四

瞿大興世業農少孤與妻趙氏勤操作遂大豐事母極孝母病痿痺不離牀蓐湯藥先嘗飲食手進昏則親滌溺器扶之安寢然後告退如是者歷二十年如一日有子六人教以義方崇師重道長子國柄爲名諸生尤好義舉倡立夫馬會以奉差務嘗謂人曰吾非多財亦體親心之所未逮耳訓導吳閱其行狀銘之曰孝子實行

杜體元七歲失怙母王氏教之讀書多病未能卒業性極孝友有兄三人皆先母卒母年六十餘痛子失明體元夫婦躬親孝養晨則親爲盥漱整齊衣履問何飲食而進之食畢負出坐於堂上少頃又負之入日或數回並不旁貸昏則滌器安寢抑搔扶持又推廣孝心延師課其子姪文炳文蔚皆早成名親心大慰生平雅好披覽因母病尤悉於醫壽七十餘終

學問

明

謝愷舉人有文行士林推重

李琛工詩文隱居樂道年八十餘終

伊作賓舉人爲翰林院待詔著作甚富惜不傳

王正紀舉人專治春秋爲後進師表

國朝

王者衡篤學能文子欒成進士有文名

王光昌貢生性耿直士林奉爲師表著有直養文集

李新槐字蔭三歲貢生讀書有識一切詩古文詞簡老精當遠近記序誌銘多出其手立品尤高鄉評推重

按州人於著述一門向不留意採輯頗難聊取其近似者錄之以備一類

附名宦鄉賢忠義節烈等祠

名宦祠在文廟戟門左祀劉燾嚴如煜二人劉字青岑別號弢子事蹟詳前政績錄嚴字樂園湖南澁浦人由嘉慶元年孝廉方正歷陝西知縣至按察使其任漢中府陝安道時整飭撫綏敦勸農桑俾南山居民各知勤業向化獷悍之風頓改

而持躬廉儉時尤稱焉道光六年贈布政使銜入祀名宦祠漢中興安兩府屬均飭崇祀

鄉賢祠在文廟戟門右祀前明謝思道劉炎王良臣徐大行四人思道炎良臣事詳前大行爲寧衛指揮崇禎十年流賊陷城大行守東角樓特刃殺賊被執罵不絕口賊怒剖其心奏聞優卹入祀鄉賢祠

忠義節烈祠俱在文廟外入祀甚夥茲取其最著者分述如下

忠義

明

張錦爲寧衛百夫長蜀寇起錦引兵至秋坡與賊戰擒斬頗多以兵寡不支而死王履泰爲寧衛指揮同知崇禎八年賊夜半陷城履泰堅守敵台隻身與戰殺賊十餘人賊莫敢樓乃圍之數重天明焚敵樓履泰從敵樓躍下復與賊戰力竭而死

曹雲梯爲寧衛鎮撫與泰同衛城分守東角樓城陷手刃數賊被執罵賊死

王彥芹致中遺腹子舉人初令巴陵適當殘破撫字不遺餘力調新城一年城陷被殺贈僉事

國朝

王國貞乾隆十三年由經制派征金川屢陷陣有功保授藍翎守備後與賊戰馬忽蹶賊攢矛刺之仆地腸出子乾從後奮力殺數賊賊來益衆力不支父子遂同死事聞贈雲騎尉祀昭忠祠

周德言庠生嘉慶二年川賊犯境德言與庠生林挺生林逢春各率鄉勇禦之屢有殺獲賊恨甚率大隊來攻力盡被執脅之不屈皆罵賊死

郭鮮修庠生亦率勇堵截川賊力戰而死

馬世泰庠生嘉慶二年五月賊突入生家生衛母不避死

宋啓祥武生爲人端方善能化俗嘉慶四年賊至督率民團阻截要路胸帶重傷死

陳希正貢生賊破其村落正衣冠縊死

彭登謚賊犯毛坪被執假降夜半手刃賊目羣賊亂刀斃之

徐正芳六品軍功同治二年髮逆竄擾正芳偕趙察安王洪元出城擊賊力竭陣亡又有庠生吳東興亦禦賊死

李國選候選教諭學問素優城陷挺身罵賊並掠賊衣賊引至南門外戕之

李作桅城陷罵賊賊怒剖腹取膽

王文煥附生年六十城陷罵賊以頭觸城垣死

高德城陷自縊死

王全盛城陷仰藥死

李貞城陷炮烙死

王慶雲年八十三猶壯健髮逆至鐵鎖關與武生何占魁率鄉勇禦賊兵敗被執賊挾以取財罵不絕口遂斬雲擲尸危崖下魁亦重傷卒年七十九

蘇開朝髮逆圍困天生寨危在旦夕開朝與白繼李乘雨夜天黑率壯士出擊賊受重傷死

羅綺華潛心理學盡心訓迪邑人士多出其門髮逆竄擾被執不屈賊怒剖衣擲

雪窖中凍飢死時年七十八

劉秉琪督團禦賊兵敗被執臨死罵不絕口

沈思敏武生沈東洋之父年八十爲賊所得罵賊不屈死

胡永成負母避賊賊尾之奮力抵禦母雖獲全成竟死

王林賊踞大安隨代理漢中營官鄒學鏞擊賊兵敗被執不屈死又有陳狗兒同

林禦賊力戰死

何添元咸豐時由把總派征江南多所斬獲積功至守備會攻揚州添元攜死士先登賊抵死禦之進益猛礮矢雨下猝中槍丸死事聞贈雲騎尉祀昭忠祠蔭守備

蘇易生由步兵派征江南從添元攻城先登直入會添元死衆潰無後繼遂爲賊所獲倒懸敵樓三日同列哀其不死擬以礮似首肯乃祭而殮之其兄全生有生亦江南陣亡俱入祀昭忠祠

張得金由馬兵累遷鎮標左營千總出差江南陣亡
賈尙福歷保守備同治元年率蜀勇三百人援鳳翔抵鳳三日出戰陷入重圍力竭死

崔彥彪藍翎千總差守郡城東門城陷死

此外有陳作賓陳作舟王文炳三人皆守陣遇害陳汝惠楊逢春等五十四名皆城陷被戕

按忠義分數等奮身殺賊至死不卻爲上慷慨捐軀以身報國者次之隨衆赴鬪轉戰而歿者又次之至邂逅遇難求生不得或爲賊羈絆以死雖獲忠義之名原無忠義之實舊志一概收入茲從略焉

節烈

艱貞苦節

明

駱蔡氏太學生駱文彥妻彥游太學氏傾奩助之夫死年二十六一子方數月家

貧塵釜無炊晏如也子補諸生旋夭折復撫二孫年八十餘卒

鈕張氏幼聰慧能文年十五適諸生鈕尙夫故誓死不二孝養翁姑死則營葬嘉靖間奏准旌門閭

張許氏庠生張講妻夫卒遺孕三月始生冰霜自矢院道旌之

蔡張氏庠生蔡廷聘妻年二十四夫死繼姑性厲氏委曲承順卒得姑歡子幼教育成人建坊旌表

張蔡氏適諸生張四聰夫卒年二十二家貧撫孤養親備嘗艱苦

趙孫氏趙洛妻年十九夫死事親撫子從一而終

楊王氏指揮楊國楨妻年十七適楊愛前妻幼女如己出越二年生子百日而楊歿守節育子長襲父職孀居六十餘年

國朝

王李氏王昭之妻夫卒年十九遺子甫三月矢死不二孝親撫孤守節六十一年

張鄭氏張洪英妻夫亡年二十二遺腹生子撫之成立

趙李氏趙瑤妻年二十五守節孝養翁姑教子成立學使馬給節比松筠匾額
姜呂氏姜漢英妻夫亡年二十五家貧姑失明力作女紅以事翁姑教子成名學
使給節孝並優匾額

趙史氏趙洪仁妻夫亡年二十三家酷貧織紡自給事親訓子無間始終
楊衛氏楊維世妻夫亡年二十四家貧苦守子天撫孫成立

張王氏張信妻夫亡年二十五獲食不繼勤女工盡孝養子卒撫孫

周趙氏庠生周俊妻夫亡年二十子甫二齡零丁孤苦撫子成名又早卒復撫孫
幼勞兩世

計魏氏計福妻夫亡家酷貧遺腹子從謙數月始生氏忍飢凍孝養翁姑子長成
以明經見稱於時

張楊氏張元妻夫亡年二十二堅志守節孝養翁姑撫子成立

李張氏李謀妻年二十五夫卒家貧井臼皆躬操事親撫孤始終如一

成黃氏庠生成章成業之母一乳三子彌月喪中子夫卒氏耕織撫二孤皆成立

學使劉給貞燕完巢匾額

楊陳氏兵士楊啓妻夫派征金川陣亡氏年二十六上事翁姑以孝謹稱撫孤成
立學使康給一門忠節匾額

熊張氏熊夢得妻夫亡子生未半歲翁姑皆死惟一祖母年八旬家徒四壁氏竭
力奉養撫育孤兒卒成立

余張氏余登甲妻年二十三夫亡矢志守貞女工所獲易粟養親尋被賊難子卒
復偕媳撫孫共完苦節

鄭何氏貢生鄭潤書之母夫紹和亡年二十一翁姑皆老家酷貧糟糠不給氏努
力操作孝親訓子子稍長作半日讀卒成名家亦漸裕大守嚴給節孝可風匾額
建坊表之

李魏氏李策妻年二十一守節事親以孝訓子成名太守嚴給蒼玉含煙匾額

蕭張氏蕭均妻年二十五守節撫孤成立卒享高年太守嚴給柏操松齡匾額

李任氏李郁生妻年二十五夫亡親老子幼備嘗艱苦撫子與孫俱成立州牧鄭

給兩世劬勞匾額

陳李氏陳克義妾家故貧夫亡未幾即有媒來逼嫁氏引刀斷指鳴官州牧鄭嘉氏苦節請於郡表其門曰保節全宗

李白氏李彩妻年二十三夫從戍歿關外僅遺幼子慷慨守義子娶婦復亡抱孫哭兒十日不輟聞者憫惻

郭李氏郭金庠妻年二十二夫歿邊塞訃至暗泣不使姑知撫二子以慰其懷家無斗筲鬻薪自給

唐李氏唐佩妻年二十夫亡家貧僅遺一女尚幼氏欲自盡姑曰若以身殉是呱呱者必死二老又何以生乃紡織養親撫姪際虞教之成立

何窈氏何自風妻夫早卒母因家貧子幼欲令改醮氏以死自矢撫二子晝耕夜績以事孀姑守節四十五年

陳楊氏陳致新妻夫亡遺子未週歲剪髮爲誓家貧姑病痿痺賴之以生撫子成立

陳李氏庠生陳逢泰妻年二十七夫歿矢志撫孤繼姑性嚴和顏承歡避寇艱苦備嘗子克成立

胡梁氏胡映敘母守節已四十年賊至避入山寨賊礮傷其左餒勢急拋石擊中前賊羣賊潰散全寨賴以無虞鄉人感之

范牟氏范洪清妻年二十一守節撫子成立

吳徐氏吳建禮妻夫亡年二十一矢志守貞飢困不改其操

趙吳氏趙學普妻學普家貧好客以是屢空卒之日家無遺粟三子一女並仰給於氏氏力攻女紅以給朝夕或日不舉火親鄰鮮有知者

屠沈氏生員屠樹平母年二十四夫卒矢志守節善事舅姑撫育子女孝慈貞靜鄰里交推

閔雷氏生員閔鐸聖妻年二十二夫卒遺子二齡家貧親老苦節終身學使吳題其門曰貞松慈竹

王汪氏殉難增生王文煥母年二十七夫卒柏舟自矢撫子成名養成勁節

席朱氏席湖妻夫亡矢志撫孤翁姑年老奉養無缺妯娌皆少於氏氏始終接之以禮一門和睦人無間言且喜爲善舉力所能爲無不黽勉

封王氏典史封合都妻性溫柔言笑不苟年二十五夫卒子圻年五歲矢志教養圻早成家素小康濟急拯困惠及鄰里州牧暨儒學均嘉其節義各贈有屏文壽八十五卒

杜李氏廩生杜韻新之母年二十五夫亡韻新尙幼氏食貧撫子教養成名

胡趙氏胡桂林妻年二十三夫亡姑老子幼氏矢志靡他藜藿自甘經髮逆之變家倍拮据氏紡績以給饗飧高堂甘旨未嘗少缺

曹王氏曹煥章妻年二十四夫亡無子家素貧養親不去適歲饑盡售奩具以供甘旨聞者賢之

祈馬氏祈鳳鳴妻年二十三夫亡矢志撫孤貧不改節

林張氏兵士林天佑妻天佑從征亡氏年二十六貧無以自存日食糠粃撫四子皆成立

劉白氏兵士劉華林妻同治二年華林調守郡城殉難家酷貧姑勸再醮氏矢志撫孤緘齋自給子亡不易其志

劉黎氏外委劉珍妻珍出征歿湖南氏矢志不二撫子養親同治二年城陷長子國順戰歿一門忠節

四世全節 方塾妻陸氏年二十二夫死二子俱幼家貧親老努力蠶績守節以終子以矩妻杜氏二十八夫死孫江妻王氏二十二夫死曾孫永德妻周氏二十四夫死皆苦節終身州牧何給四世完貞匾額旌之又武生金鑾母曹氏性端謹言笑不苟年二十二夫聯登死家酷貧親老子幼堅志撫孤賴以成立鑾兄弟金境妻王氏金鐘妻魏氏族兄弟金俊母王氏俱二十餘守節時人稱之

一門雙節 庠生楊本立祖母王氏夫早亡撫子子又夭逝遺孫本立最少其媳侯氏亦能繼姑志撫之成立學使楊給彤管雙清匾額 王長清母梁氏年二十

八夫死長清最幼梁撫之備嘗艱苦長清亦早卒媳蕭氏年二十一遺子文盛甫周歲蕭氏呼天號泣不欲生旣念姑痛子失明王氏又無他裔乃誓守孝親治家

撫孤成立州牧楊汪何均贈有匾額 庠生王道蕩繼母李氏年二十二夫死矢志守貞撫道蕩如已出道蕩死子亦幼其妻李氏奉孀姑教子成立 武生李國用妻杜氏夫亡年二十六子一歲守節其姪餘慶妻趙氏夫亡年二十五子二歲守節 又監生石瑾章妻張氏與其弟庠生琢章妻楊氏皆先後守志事親撫孤子克成立

此外有趙珂妻馬氏年二十九夫死唐思恭妻王氏年二十七夫死楊天經妻李氏年二十七夫死庠生唐爾慧妻張氏年二十六夫死廩生楊圮妻王氏年二十八夫死武生蔣淵妻成氏年二十九夫死王開渭妻楊氏年二十八夫死趙能璧妻秦氏年二十七夫死貢生李正陽母舒氏年二十八夫死庠生舒錦章母王氏年二十七夫死成秉發妻王氏年三十夫死陳良棟妻成氏年二十八夫死庠生何其恆妻鄭氏年二十餘夫死田懷祥妻何氏年二十八夫死胡紹鵬妻陳氏年二十四夫死楊相邦妻宋氏年二十八夫死外委蘇君信妻舒氏年二十八夫死俱撫孤完節又張鑑妻王氏年二十九夫死趙鳳妻陳氏年二十八夫死庠生王

永昭妻李氏年二十八夫死彭煥妻張氏年二十九夫死黃琪沛妻成氏年二十九夫死俱貧不改節

以身殉節

明

王靳氏靳子義之女年十六適諸生王以棟環堵蕭然夫亡以身殉就縊姑蕭救解曰我夫亡子卒依汝終身何可以死婦愀然從命孝事其姑視夫存日尤謹哀感時對姑則飲涕爲笑未幾姑病亡殮後氏向王生柩曰我事畢得見君於地下矣乘間縊於姑柩之側時年二十有二蜀人郭慶年爲之傳

曹靳氏庠生曹良輔妻崇禎八年流賊破城氏自度不免對夫自縊曹被執見賊將害州牧曹泣曰清如羅公囊無半文必欲殺之願以身代賊義之俱免害有司表其門曰節義齊芳

沈蔡氏庠生沈文斗妻寇至夫婦被執寇欲殺其夫氏請以身代寇不從氏怒罵遂俱被殺

谷張氏谷自登妻流賊陷城登適他往氏囑子曰汝雖幼汝父清白傳家汝母敢
爲賊污耶遂自縊婢解之氏呼其夫觸牆而死督憲洪旌之曰節烈正氣

國朝

彭李氏彭登元妻夫亡年十九遇寇欲犯之氏抱女悲號頭觸柱血出賊怒矛傷
胸數十處死

郭高氏郭玉妻夫亡年十八以死自矢已復自責曰有姑在義不容死因縞素紡
績奉親姑死葬三日結衣自縊州牧憫其節孝旌之

王李氏王化奇妻夫亡痛不欲生遂自縊女石姑年十七不忍離親亦從死州牧
鄭緒章嘉其貞孝令族長建祠旌以聯匾

段劉氏段榮妻榮久客不歸其母年老無依氏事姑克盡孝養髮逆之變城將陷
氏仰藥死年四十

薛李氏庠生薛豔芳妻年二十遇賊被執矢志不屈賊炮烙其腹死

龔薛氏龔蛟妻年二十八遇賊不屈賊以刀洞腹死

蒲陳氏蒲振淮妻守節已四十餘年城陷罵賊受重傷死

吳胡氏吳學魯妻年二十九守節城陷不屈死

李金氏李連級妻年二十六城陷服毒恐不速死與孔子成兒結繩對縊

徐張氏藍翎儘先守備徐先奉妻城陷氏扶姑潛逃賊突至前欲犯之氏大罵賊
持刀劈面死時年二十九

傅趙氏傅登泰妻年近六旬城陷罵賊賊忿極痛捶之血污滿身聲色益厲遂死
又田仲妻劉氏亦城陷罵賊被毆自刎死

黎侯氏黎在忠妻年七十賊縱使去氏勸賊改行繼之以罵賊忿殺之

趙張氏趙敬妻年八十六賊憐其老使去氏仗義罵賊被殺

李黎氏李遇杜妻城陷與其夫及其子同死

李白氏兵書李凌霄妻年二十二城陷與其子時新及長女青雲次女攀雲幼女
採蓮同死

楊王氏楊逢泰妻年四十城陷與其女冬花同死

楊袁氏廩生袁端女避寇入山被執氏伺賊他顧投崖完節

陳王氏庠生王錫智女避寇鞍子山賊攻甚急氏恐寨陷被辱投崖捐軀

張林姑張金槐女年十七避寇山寨寨陷與堂妹百花毀容罵賊賊併殺之

蒲杏花生員蒲尙珍女年十七與堂妹貞香遇賊俱不屈死

王寡女王義之女遇賊投崖死

此外有杜映福妻汪氏王德明妻吳氏俱城陷罵賊死周之禎妻魏氏武福申妻

周氏陳登甲妻郭氏白安忠妻賈氏皆城陷自盡何增祥妻黃氏蒲元清妻黃氏

皆遇賊投崖死李國均妻高氏李伍才妻張氏孫應和妻封氏王登元妻沈氏王

洪元妻趙氏王連貴妻白氏王仲妻燕氏王春妻杜氏田懷喜妻王氏田發生妻

周氏田福厚妻李氏張正貞妻陳氏梁有貴妻賈氏林有貴妻蕭氏朱秀妻郭氏

蒲振海妻趙氏皆城陷殉節又陳汝惠妻許氏陳才芳妻鄭氏及其姊改秀俱在

府城殉節

附錄近事二則 試用巡檢李蔚霞妾王氏本蜀人幼讀書明大義工書畫識算

繡刺並精以家貧鬻爲媵攜之歸數年不育夫又娶二妾氏處之晏如也庚子夫
因事北上道病至家卒家人痛楚異常氏略不悲戚以其有他志一日嚮辰門不
啓家人就視之則氏及婢鳳麟俱死焉州牧旌其門曰節義成雙 馬秉乾妻呂
氏素謹温篤於伉儷夫病醫藥罔效氏知其不起乃先期爲死具備衣兩襲男女
各一家人俱不測及夫卒氏竟仰藥死州牧旌之曰同穴風高

按節烈大致分死節守節二類志操雖異貞烈無殊且嬰之生尤難於白之死
焉蓋死節爲一時之事守節乃持之終身未有志操不堅而能始終無渝者也
但其間亦有差等以出自真誠歷變不撓爲上循分自守次之若非其本志或
被姑嫜拘禁或戀子女田宅名存實亡甚無足取舊志不免濫入茲特擇尤抄
錄以備採覽

人類

本境雖氏羌故地然歷朝以來遞經淘汰腥膻盡除即有一二存者亦久與漢民
同化水乳交融不辨孰清孰濁已故今日全境居民除漢種外並無各族祇有少

數回民聚居陽平關西南哈家山約共二十餘戶內以哈姓者爲多係國初自漢中遷入安插於此其源流世系多不可攷總之不出乎阿拉伯人者近是其俗則務農經商與漢人同惟恪守穆罕默德教規不嗜豬肉死者殮以囊不用衣衾棺槨有禮拜堂一所代推一人主持之名曰阿洪婚喪之事皆預焉每七日詣堂禮拜聚族而往皆喃喃誦經有女不與漢人而娶漢人妻人以其狡黠多無與往來者咸豐初有賽姓移居舒家壩橫甚鄰里不堪其擾聚衆而殲之此種人遂無復多事相安至今

戶口

本境當建衛之初戶口稀少藍鄙爲患剝削益微嘉靖時調查甯羌衛戶不滿二千口不滿一萬五千嗣由川廣各處移來者漸衆安撫境內頻年有增殆明季流寇之禍數遭蹂躪十室九空又蕭索如初矣迄於國朝休養生息二百餘載生齒日繁然吳逆之變擾攘經年教匪之亂大肆焚掠重以髮逆滋擾饑饉相因民未死於兵者多死於歲又有光緒三年之大旱全秦被災甯亦道殣相望焉近年

以來殊無大異惟南山一帶野豕妨農民多徙去燕子偏教案株累牽連數年不靖且各處商務蕭條市面彫敝歇業甚多於本境戶口之盛衰皆有絕大關係者也茲據光緒二十五年調查之實數爲戶一萬六千零四十八口五萬六千五百一十一內有男口三萬一千六百五十七女口二萬四千八百五十四並無旗戶

氏族

本境爲五方雜處之地客籍往來多無定所昔人謂之棚民土著極尠其有入籍稍久似續延長宗支蕃衍稱爲世家大族者又因譜系亡於兵燹無由以考其世代源流是亦譜牒之學久亡而邑人又不講宗法故難免籍談忘祖之誚也茲特約舉一二以備採覽

王氏有三（一）周畢公高之後爲邑老戶世代無考（二）周靈王太子晉之後世家太原明季自太原遷長安康熙八年改遷甯羌至今傳十二代（一）本周氏祖籍天津明總兵官遇吉之子燧於順治五年避難至陝僦居沔縣黃沙鎮燧死其子玉管徙甯爲王氏子遂姓王至今傳十一代

李氏皋陶之後因官命族爲理氏商季改姓李自唐以來世爲名族宋紹興中有李朝正爲戶部侍郎晉封溧陽今江蘇鎮江府溧陽縣開國男遂家於溧陽國初由溧陽遷甯羌至今傳九代

黎氏本栗姓爲栗陸氏之後世居長安明萬歷時有栗成官甯羌衛世襲鎮撫遂家焉四傳至藩補弟子員學使潘面改粟爲黎因姓黎至今傳十二代

陳氏舜後以國爲氏國初由湖北武昌遷入至今傳六代又邑舊有陳氏爲前明老戶世代無考

胡氏舜後系出胡公因姓胡氏康熙二年由四川縣竹遷入至今傳九代

馬氏趙奢之後奢封馬服君因以爲氏或去服爲馬秦滅趙孫興徙咸陽乾隆時改遷甯羌至今傳五代

周氏本姬姓唐先天中避明皇嫌名改周氏明時由湖北均州遷入世代無考

何氏韓王安之後韓滅子孫分散江淮音訛以韓爲何氏明初自江西遷沔縣復遷甯羌世代無考

成氏楚若敖之後系出成得臣以字爲氏明初自四川縣竹遷入世代無考

姜氏齊後以其先炎帝生於姜水因以爲氏明洪武間有姜觀爲甯羌衛指揮遂家於甯世代無考

席氏本籍氏晉大夫籍談之後談十三世孫避項羽諱改爲席氏明季由湖廣遷入世代無考

白氏楚白公勝之後以邑爲氏明時由湖廣遷入世代無考

蒲氏苻洪之後以家生苜蒲長五尺人因呼爲蒲家明季由山西遷入世代無考

党氏本出西羌姚秦党虎之後明時由隴州遷入世代無考

种氏本仲氏周仲山甫之後明時由四川遷入世代無考

彭氏彭祖後以國爲氏明時由四川遷入世代無考

張氏晉解張之後以字爲氏明時由湖廣遷入世代無考

田氏陳公子完懼禍奔齊改姓田氏漢徙關中明遷一支至甯羌世代無考

黃氏嬴姓陸終之後受封於黃以國爲氏明時由湖廣遷入世代無考

此外大姓有趙氏少皞之後以國爲氏鄭氏鄭桓公之後以國爲氏韓氏晉武子後以邑爲氏唐氏堯後以國爲氏謝氏周申伯之後以邑爲氏皆前明老戶世代無考又劉氏堯後系出劉累以邑爲氏梁氏伯益之後以國爲氏薛氏黃帝之後以國爲氏齊氏姜姓之後以國爲氏封氏夏封父之後以國爲氏徐氏伯益之後以國爲氏曹氏周曹叔振鐸之後以國爲氏蔡氏周蔡叔度之後以國爲氏秦氏秦仲之後以國爲氏郭氏郭公之後以國爲氏曾氏鄩國之後或去邑爲曾氏任氏黃帝之後以邑爲氏沈氏周聃叔載之後以邑爲氏虞氏虞仲之後以邑爲氏葉氏楚沈諸梁之後以邑爲氏杜氏周杜伯之後以邑爲氏毛氏周毛伯之後以邑爲氏袁氏亦作爰陳伯爰之後以字爲氏孫氏衛公子惠孫之後以字爲氏方氏周大夫方叔之後以字爲氏余氏秦由余之後以名爲氏林氏周平王庶子林開之後以名爲氏高氏齊公子高之後以名爲氏熊氏楚鬻熊之後以名爲氏計氏越大夫計然之後以號爲氏傅氏傳說之後說築於傅巖因以爲氏石氏衛石碓之後金氏金天氏之後皆明時遷入不詳所自世代亦無考

宗教

本境民風醇直向不肯崇奉外人以亂吾中國固有之宗教自 國初回民入境始建有禮拜堂然除阿拉伯人外崇信絕少至光緒二十六年州西大饑法國天主教士郭錫德以賑飢爲名誘民入教洎來者日衆供億不支乃紛紛苛派良民主客交訐遂起焚殺之禍事定後立約傳教城內及燕子礮各建教堂一所而本境不肖之愚民遂倚此爲逋逃藪矣茲查現奉外教之人數回教人約五十餘名天主教人約五百餘名女口不計

實業

本境土瘠民貧強半失業其稍能自立者日營營於生計不暇及他故士類殊少然數年以前每十人中猶得一二自庚子教案議結停試五載近又改訂新章設立學堂鄉曲老儒昧於時勢阻撓多端風氣之不開通教育之難普及有由來已農業一門稍爲發達惜未知講求新法以盡地力且勤農少而惰農多亦農學未興之故也至於工商二者全未講求而工較商尤寡通計每百人中幾無一人業

此者商雖居其多數但以工業窳敗製造無人利源終無由闢商務所以日衰也
茲就現在情形覈計之全境有業之民士約千人農約萬人商約三千人工約百
人其餘則老弱癯疲及無業游民殆居十之五六焉民困曷極有心人安忍度外
置之也

地理

黎採彰彩輯

境界

本境在省城西南漢中府之西南距省約一千三百二十里距府約二百九十里
北與略陽縣接界東及東北與沔縣接界東南與南鄭縣及四川南江縣接界南
及西南與四川廣元縣接界西與四川昭化縣及平武縣接界西北與甘肅文縣
及階州接界東西最長處約三百九十餘里南北極濶處約二百八十餘里面積
約一萬八千方里

區劃

本境舊分永清永寧永康永福四里今分四十八牌可別爲六大區

(一) 本城有牌二(南牌)占城之南部包有南街大小東街與城南附郭一
帶地方州署學署及文廟文昌廟藥王廟劉公祠神祈壇社稷壇在焉官立高等
小學堂一建于文廟之右初等小學堂一附設劉公祠地勢西高東下玉帶河自
東部繞而南起鳳岡自西部繞而北玉帶河之右有東山觀與城內起鳳岡對峙
爲東部最高之處(北牌)占城之北部包有北街西街與城北附郭一帶地方
游府守府及武廟城隍廟龍神廟火神廟昭忠祠在焉地勢南倚起鳳岡北環玉
帶河河上有鐵鎖橋接聯城內其左岸即北關市街爲驛道所經商貨往來頗著
繁盛市北有清官坊二南有節烈坊二中有三聖祠爲初等小學堂附設之所又
有北山觀在市北里許

(一) 東路有牌五(羅村埧牌)在州東十里許西與本城南北二牌及中路
柏林驛牌接界東與鐵鎖關牌接界南界南路二郎埧麥子坪二牌東北界中路
滴水舖牌地勢南北有高山橫亘中部稍低玉帶河自城南東下流貫全境沿岸
多平坦之地農利頗饒河左岸有高寨子爲東路第一市場祠廟最多以市街之

武廟爲大公立初等小學堂一在市東五里韓家堂（鐵鎖關牌）在州東五十里西界羅村填牌東界唐家填牌東北界胡家填牌北及西北界中路寬川舖滴水舖二牌西南與南路二郎填牌接界東南與南路西流河牌接界地勢概屬高山關峽尤險其絕險處有山對峙如門玉帶河奔流其中水石冲激澗深百仞爲州東極要之隘市集在關峽南有把總汛駐守（胡家填牌）在州東偏北百里西與鐵鎖關牌接界東南與唐家填牌接界東北與老代填牌接界北界沔縣西北界中路白岩河地勢山谷糾紛溪澗縱橫玉帶河自中部曲折北流水量漸大可通小舟陸路交通亦廣爲州東商販匯集之所市街後倚鳳凰寨祠廟以鎮江寺爲著（老代填牌）在州東偏北百一十里西界胡家填牌南界唐家填牌東北一帶並與沔縣接界地勢錯入沔縣界內境域極狹路通漢中有水自沔縣七里溝入境環繞而北仍入沔縣山勢隨之（唐家填牌）在州東百二十里北與老代填牌接界西北與胡家填牌接界西與鐵鎖關牌接界南界南路西流河牌東及東北與沔縣西南境交錯地勢南有大山環繞爲東南兩路之界線北部山

嶺亦大中部爲平溪河上流所經地稍平坦東有老龍祠在甯沔界上

（一）南路有牌七（七里填牌）在州西南十里許東及東北俱界本城南牌西北界西路沙河子牌西南界迴水河牌南界麥子坪牌地勢南部山嶺極高北瀕玉帶河一帶地多平坦其右岸有七里堰引河灌田千餘畝爲州境水利最饒之區（迴水河牌）在州西南三十里東與七里填牌接界東北與西路沙河子牌接界南與麥子坪牌接界西南界黃填驛牌西北界西路大竹填牌地勢全部多山平地甚少河自牢固關曲折北流市街據其右岸其左近有鐘山寺高出雲表即古飛仙閣（黃填驛牌）在州西南五十里東北界迴水河牌東界麥子坪牌西北界西路大竹填牌西南一帶並與四川廣元縣接壤地勢當南北要衝西南門戶驛置牢固關七盤關之間疊障重巒勢甚險要有把總汛駐守（麥子坪牌）在州南六十里北與七里填牌接界南與四川廣元縣接界西界黃填驛牌西北界迴水河牌東界二郎填牌東南界八廟河牌地勢山大林深居民稀少惟南部有關口填當川陝接界之處商販往來多出此道爲南路第一市場（八廟

河牌）在州南偏東百里西北界麥子坪牌東北界二郎墳牌南有流沙坡突入川境與廣元縣壤地相錯地勢當南山最深之處重山嶂蔽高險異常西流河自亂山中曲折西南流至毛墳河有市集在其右岸對岸即交川界（二郎墳牌）在州東南五十里西南與八廟河牌接界西與麥子坪牌接界東與西流河牌接界北及東北界東路羅村墳鐵鎖關二牌地勢爲大山盤亘之地背負天台前臨西流河河自東部入境橫貫而西沿岸多陡崖壁立萬仞上有天生橋兩山逼接石徑中通爲天然奇境市集二一在本墳一在羅家墳又有水田坪爲山中平地（西流河牌）在州東偏南百三十里西界二郎墳牌北及西北界東路唐家墳鐵鎖關二牌南與四川廣元縣接界東與南鄭縣接界東南一隅與四川南江縣接界又有褒城縣屬地在大小沙河之間爲南路第一大牌地勢高絕林密山深可耕之地甚少市場有板倉墳元墳子梨坪梨坪爲州東南境之分水脊高聳絕倫西流河即發源于此其上有冷墳冬令寒甚即古寒山

（一）西路有牌十八（沙河子牌）在州西北二十里東南與本城北牌接界

西北與板踏河牌接界西界大竹墳牌南界南路七里墳迴水河二牌東及東北與中路柏林驛滴水舖二牌俱接地勢山多浮沙土質鬆泛夏秋之際山水盛漲沙河沿岸民田多被沙淤民甚患苦祠廟有茅崖寺（板踏河牌）在州西北四十里東南界沙河子牌西界大竹墳牌東界中路南沙河牌西北部插入三道河牌內地勢山嶺縱橫河流曲折西向其左岸有舒家墳山產四集市場頗盛市街東有武廟（三道河牌）在州西北八十里東南與板踏河牌境交錯西南西均界大竹墳牌西北界陽平關牌北界北路徐家墳牌東界中路南沙河牌地勢橫瀾形如凹字板踏河自中部流入斜向西北沿岸有山絡驛奔赴隨水而西（大竹墳牌）在州西百一十里爲西路第一大牌東北與三道河陽平關二牌接界西北據嘉陵江與黃家墳下清河青崗坪三牌接界西南與四川廣元縣接界西界木槽溝牌東界沙河子板踏河二牌東南一帶與南路黃墳驛迴水河二牌俱接地勢當萬山叢集之處面積最大土曠人稀東部有甯江寨四圍高山中有平地爲昔人避亂之所北有龍門山其下有龍門洞多古名人題詠水道甚狹惟東

部之韓家河稍巨市集在本填及曹家填祠廟有龍門寺（陽平關牌）在州西北九十里西南界大竹填牌東南界三道河牌東北以一部界北路徐家填牌北以嘉陵江界黃家填牌地勢前臨江水後負雞山左有韓家河右有板踏河分流入江江水盛漲時民船可上溯略陽下駛重慶又自三道河東行可直抵州城兼通大安西出鹽茶關達階州文縣商旅四集交通頗便爲州境第一繁盛之區有州同及都司營並駐守其地祠廟不一惟鎮江寺最爲宏敞官立初等小學堂附設于此（黃家填牌）在州西北一百里南與陽平關隔江相望西界下清河牌東北界上清河牌地勢北部有山環繞而南直達江岸中間平地頗多有魚山突起與南岸雞山對峙上有營寨相傳爲武侯屯兵之處（下清河牌）在州西北百二十里東南界黃家填牌東北界上清河牌西界青崗坪牌南以嘉陵江界大竹填牌西北與甘肅階州接界地勢當清河下流北多高山南有陳家填地頗平坦在清河入江之口（上清河牌）在州西北一百六十里西南與下清河牌接界西北與甘肅階州接界東北與略陽縣接界南與黃家填牌接界東部錯入黃

家填與北路徐家填流溪溝之間而以嘉陵江爲西北兩路之界線地勢據清河上流山嶺最多異常高峻河自山澗下流岸少平地有市集在蒼社溝（青崗坪牌）在州西稍北百三十里東及東北俱界下清河牌西界入海河牌西南界木槽溝牌東南與大竹填牌依江爲界北部爲斜面接甘肅階州境地勢北有金子山橫互境內其上有千佛寺創建甚古遠近著名下有平地廣數里法國天主堂在焉其東有燕子礮當燕子河入江之口商販往來市場頗盛（木槽溝牌）在州西百五十里東北以一部界青崗坪牌西北界入海河牌西界安樂河牌西南與四川廣元縣接界東越嘉陵江與大竹填牌接界地勢當嘉陵江南下之衝沿岸有高山夾峙西部山嶺尤大東北部江流灣入曲折南向俗稱倒灣灣內平地頗多有大祠廟一名天池寺又有鎮江寺在南部江岸青灘廟爲江流入川之處（入海河牌）在州西偏北百七十里東南與木槽溝牌接界東與青崗坪牌接界北與甘肅階州接界西北界石甕子牌西南界安樂河牌地勢有山橫互全境河流直貫而下崖陡澗深市集在河之左岸距階州界最近（安樂河牌）在州

西百七十里東北以一部界入海河牌東及東南界木槽溝牌南界四川廣元縣西北一帶與廣平河葉子壩石甕子三牌俱接地勢山谷縈繞不甚高峻河自東北入境曲折南流市街據其東岸其西有鹽茶關爲通階秦之要道南有仙山觀勢甚雄壯（廣平河牌）在州西一百九十里東部錯入安樂河葉子壩二牌之間西與柳樹壩牌接界西北與青木川牌接界南界四川廣元縣地勢山多低小河流曲折南向沿岸一帶地頗平坦市集在河岸之右（柳樹壩牌）在州西二百一十里東與廣平河牌接界西與金山寺牌接界南界四川廣元縣北部插入青木川牌內地勢有山不大平地頗多市集在水觀音有泉四時不涸（金山寺牌）在州西二百四十里東界柳樹壩牌北界青木川牌西南一帶與四川昭化縣接界地勢南有高山特起北部爲青木川下流所經地頗平坦市街據川之南岸祠廟有龍神廟（青木川牌）在州西稍北二百六十里南與金山寺柳樹壩廣平河三牌接界東與葉子壩石甕子二牌接界北及西北與甘肅階州文縣接界西與四川平武縣接界地勢山谷陵雜溪澗交橫西部爲川流所經市街據其

右岸東部屬廣平河流域其右岸有魚全壩亦本牌市集之所祠廟金台觀文昌廟最大（石甕子牌）在州西稍北二百二十里西界青木川牌西南界葉子壩牌東北界入海河牌東南界安樂河牌北與甘肅階州接界地勢全部皆山平地極少山產尙饒（葉子壩牌）在州西北二百一十里北與石甕子牌接界南與廣平河安樂河二牌接界西部界廣平河青木川二牌之間地勢多山牌境極小（一）北路有牌六（東皇溝牌）在州北百里西北界何家壩牌西界抄紙衛牌西南界徐家壩牌南界中路南沙河牌東與中路寬川舖烈金壩導嶺溝三牌俱接地勢有山如帶東西盤亘東部爲蟠豕正幹經行之地山脉尤長南與徐家壩接界之處有戴家壩商販所集山產甚饒爲北路第一市場（抄紙衛牌）在州北百一十里東與東皇溝牌接界南與徐家壩牌接界西界流溪溝牌北界何家壩牌地勢山嶺歧出河流縱橫黑水河之上流鞏家河挾龍洞河冷家溝東皇溝諸水曲折南流市集在河岸之右其西南有中台寺據中台山上爲一方佳勝（何家壩牌）在州北百五十里南界抄紙衛牌西南界流溪溝牌西界賈家坪

牌東界東皇溝及中路導嶺溝二牌北部一帶與略陽南境交錯地勢北有大山橫亘分支四出遍佈全境惟中部二郎墳左右地稍平坦市集所在（賈家坪牌）在州北稍西百七十里東與何家墳牌接界東南與流溪溝牌接界西北二部俱界略陽而以嘉陵江爲西部之界線地勢東北山大西距江岸一帶稍有平地其北有白崔寺插入略陽界內距略陽縣城僅四十里爲本牌市集之所（流溪溝牌）在州北稍西百四十里西北界賈家坪牌東北界何家墳牌東南界徐家墳牌東界抄紙衛牌西據嘉陵江與西路上清河牌接界地勢東部有山環繞自北而南其分支蜿蜒四布西達江岸市集在曾家河當本牌與何家墳賈家坪二牌之間（徐家墳牌）在州北偏西百里西北與流溪溝牌接界北與抄紙衛牌接界東與東皇溝牌接界西以嘉陵江界西路上清河牌南界西路三道河牌西南以一部界西路陽平關地勢當山水交會之處南沙河自東部來與鞏家河合流爲黑水河沿岸一帶在山絡繹西行阻水而止其右岸有市名雙龍塲據黑水入江之口

（一）中路有牌八（柏林驛牌）在州北十里許南與本城北牌接界北與滴水舖牌接界東界東路羅村墳牌西界西路沙河子牌地勢北有高山南距州城一帶地稍平坦有天池水合五丁南峽之水自滴水舖牌入境南流沿岸居民頗資灌溉驛所在北山之麓舊置于此今改歸城內（滴水舖牌）在州北稍東三十里南界柏林驛牌北及東北界寬川驛牌西北界南沙河牌西南與西路沙河子牌接界東南與東路鐵鎖關牌接界地勢山嶺崇大北有五丁關置五丁山上即古蜀王命五丁開山處其峽亦曰五丁峽又稱金牛峽峽內高山聳峙峭石壁立驛路盤折而上一線僅通爲蜀道之最險舖在關南十五里據南峽之口爲本牌市集所在祠廟有滴水寺（寬川驛牌）在州北稍東六十里南與滴水舖牌接界北與烈金墳牌接界東及東北俱界白岩河牌西北界北路東皇溝牌西南界南沙河牌地勢據五丁關之北自關以下險徑十五里爲山之北峽其極險處視南峽尤逼市街緊當峽口山勢漸開平地頗多峽水自南來曲折北流驛所在市街東（南沙河牌）在州北五十里東北界寬川驛牌東南界滴水舖牌北界

北路東皇溝牌西及西南與西路三道河板踏河二牌相接地勢據五丁關之西不通驛路五丁山自東部分支橫亘河之兩岸其東北有陡嘴子梁勢極險峻祠廟有楊家寺（烈金填牌）在州北偏東八十里南與寬川舖牌接界北與導嶺溝牌接界西界北路東皇溝牌東界大安鎮牌地勢前臨漢水後倚蟠冢蓮屏山與蟠冢山對峙驛路繞之而南西通金牛峽水與漢交合之處即市街所在爲古金牛驛故地有禹王廟（大安鎮牌）在州東北九十里西界烈金填牌南界白岩河牌東界桑樹灣牌北界導嶺溝牌地勢當大安河與漢水合流之處水環如帶山列如屏道路四通市場最盛爲古三泉縣及大安軍舊治有把總汛駐守祠廟甚多以秀峰觀妙相觀及道門菴爲最著官立初等小學堂一在市街東（導嶺溝牌）在州東北百三十里南與大安鎮烈金填二牌接界北與略陽縣接界西及西南與北路何家塢東皇溝二牌接界東部一帶俱界啓寧山牌地勢當寧略陸路交通之要衝山徑崎嶇盤折高險大安河自山澗南下激湍不平其北有鐵佛寺宏濶壯麗爲州境第一大廟（啓寧山牌）在州東北百五十餘里西

界導嶺溝牌南界桑樹灣牌北與略陽接界東及東南錯入沔縣界內地勢崖陡山深絕少平地東部與導嶺溝相接處山嶺尤大尙有未闢老林（桑樹灣牌）在州東北百里北與導嶺溝牌接界南與白岩河牌接界西界大安鎮牌東界沔縣地勢南北山高中瀕漢水一帶平地頗多其東有金碓舖山環溪繞驛路中通爲沔南山水極佳勝處（白岩河牌）在州東北百一十里北界桑樹灣大安鎮二牌南界東路鐵鎖關牌東南界東路胡家塢牌西界寬川驛牌東北一帶與沔縣西境交錯地勢三面環山東部爲玉帶河所經白岩河自西部曲折東流橫貫全境沿岸多高山起伏溪澗交橫其北岸有宴爾溝爲本牌市集之所祠廟以金龍寺爲著

山脉

本境山嶺極多支派複雜可就地勢而區爲三大類

（一）屬于蟠冢山脉者卽嘉陵江以東牢固關以西玉帶河以北諸山是也其脉自秦嶺分支南經鳳縣留填褒城沔縣略陽至州北九十里烈金填東皇溝二

牌之間突起高大之主峯有漢水發源于東向東北流黑水河發源于西向西南流其支脉分歧四出散佈于中北兩路及東西兩路之半內以塔山啓寧山五丁山天池山玉簪山寨子山蓮屏山麻山爲最著（塔山）在州北百六十里爲蟠冢西出之支幹自東皇溝西北繞何家坨至賈家坪突起爲黑水河之西源其水向東南流山亦折南行經流溪溝抄紙衛二牌之間西抵黑水口而止（五丁山）在州東北四十五里爲蟠冢南行之正幹自烈金坨西南行折東南行突起于寬川舖滴水舖二牌之間有水南北分流南爲五丁南峽水北爲五丁北峽水（天池山）在州東北六十里自五丁山分支東北行至寬川舖之東南特起有天池水發源于此向西南流（玉簪山）土稱黃茂山在州東三十餘里自天池山分支東南行繞羅村坨之北鐵鎖關之西東抵玉帶河而止（寨子山）在州東北七十里自天池山分支東行至白岩河牌之西突起爲白岩河之源其水向東北流山亦東北行抵白岩河入玉帶河之口而止（蓮屏山）在州東北八十里自天池山分支北行至烈金坨東南特起與蟠冢對峙復循漢水經大安鎮桑樹

灣二牌之南入沔縣界（麻山）土稱亂山在州西四十里迤百里自五丁山分支南行經滴水舖柏林驛折西南行至沙河西北大竹坨東南山勢陡起亂峯插天北抵板踏河西盡嘉陵江南入四川東接牢固關包有寧江寨柴山林桅桿嶺龍門諸險其分支西走于陽平關之南者爲雞鳴山韓家河與板踏河之上流沙河俱發源于此一西北流一北流（啓寧山）在州東北百三十里爲蟠冢北來之正幹自略陽分支南行于大安河左岸者經啓寧山導嶺溝二牌之間至桑樹灣北陡落爲無數小山南抵漢水而止


（一）屬於巴山山脉者卽牢固關以東玉帶河以南諸山是也其脉自牢固關起點西與蟠冢山脉接南有黃坨河發源向西南流北有迴水河發源向東北流其東則崇山峻嶺疊嶂層巖橫亘州南及州東一帶內以南山照壁山箭竹嶺天台山潔山寒山清明山爲最著（南山）在州南四十里爲巴山山脉之正幹自牢固關東行聳起于麥子坪七里坨二牌之間者其勢橫絕南北起伏甚少復東行至羅村坨南山頭峯各有鷹嘴龍頭之險（照壁山）在州南六十里麥子坪

牌內爲巴山南出之支幹自南山低降南行折西行陡起與南山對峙壁立千仞其絕高處尙出南山之上下有石穴東爲嘉魚洞西爲龍洞河之源（箭竹嶺）在州南三十五里七里填牌內爲巴山北出之支幹自南山陡落復起分支北迤爲州城之起鳳岡玉帶河亦發源于此向西北流（天台山）在州東南四十里爲巴山之正幹自南山東行經羅村填至鐵鎖關二郎填之間聳起如台南有西流河繞之而西北有玉帶河繞之而東與玉帶河西流河相距最近處俱不半里（潔山）在州東六十里自天台山東行折西行繞襄山溝至鐵鎖關東北復東行至唐家填西流河二牌之間山勢綿亘不絕如帶爲南東兩路之界山（寒山）在州東南百七十里自潔山分支南行折西南行至西流河牌之梨坪山之高度已達極點有大小冷填爲山頂平地州南諸大水多發源于此其向西北流者爲西流河源向西南流者爲八廟河源山自二河之間西行至二郎填東爲掛子山又西爲常家岩抵八廟河入西流河之口而止（清明山）在州東北九十里自潔山分支北行至老龍祠有水西南流爲平溪河山折西北行又分一支折西行

至唐家填西北與胡家填接界之處陡起與潔山遙峙即清明山其餘脉至平溪河入玉帶河之口而盡

（一）屬于岷山山脉之武都山脉者即嘉陵江以西諸山是也其脉自岷山分支東南行爲階州西之武都山復東南至階州分防白馬關支脉歧出南行入境分佈于嘉陵西岸諸大河之間內以金城山金山及小金山爲最著（金城山）在州西北百六十里上清河牌內清河即發源于此向東南流其分支盤亘于清河兩岸左由黃家填之北環繞而南爲大小魚山右由下清河之西北橫斜而西爲燕子礪山俱抵嘉陵江北岸而止（金山）在州西百四十里青崗坪牌內東距燕子河及嘉陵江約十里西距入海河約十里近山一帶盛產金沙土人因呼爲金子山其山勢綿亘起伏繞入海河至木槽溝之南爲觀山又西至安樂河爲仙山觀山餘脉入川（小金山）在州西二百四十里金山寺牌內西距青木川約一里東距廣平河最近處約二十里自青木川牌延入邈迄而南經柳樹壩至金山寺街後突起爲產金極旺之山向曾有人開採現被封禁已久

以上諸山可爲山系表以明之



水誌

本境水道甚繁秋冬多枯亦可就地勢而區爲兩大部

(一)屬于漢江流域者即巴山山脉以北嶓冢山脉以東諸水是也其間以漢


水爲主要玉帶河次之(漢水)一稱漾水發源州北九十里嶓冢山之東自洞中噴薄而出東南流至烈金填五丁北峽之水自五丁關發源東北流經寬川舖來會合流而東始稱漢水流至大安鎮大安河自略陽分水嶺發源東南流至導嶺溝合大魚洞水來注之復東流經桑樹灣至金碓舖出境入沔縣界約行境內四十里自烈金填以下流俱平緩水盛時划子船可上溯至大安鎮餘可行筏甚爲艱澁行者甚少(玉帶河)發源州南三十五里七里填牌之箭竹嶺西北流至土門舖迴水河自牢固關發源東北流來會合流至州城北五丁南峽之水自五丁關發源西南流來注之折南流至州城南復折東流經羅村填至天台山之北麓折東北流出鐵鎖關至潔山北平溪河自唐家填東北老龍祠發源西流來注之又東北至胡家填折西北流至下河口白岩河自白岩洞發源東北流來注之又西北穿沔縣地至窗子溝出境入沔縣界約行境內百七十里其下流至沔陽山南與漢水合名東河口自河口上溯至胡家填水勢較平可行划子胡家填以上至鐵鎖關俱可行筏惟冬季水勢枯減運行不便

（一）屬于嘉陵江流域者即巴山山脉以南蟠豕山脉以西及嘉陵江西岸諸水是也其間以嘉陵江爲主要西流河次之安樂河廣平河青木川又次之（嘉陵江）即古西漢水亦稱犀牛江發源甘肅秦州西南之蟠豕山西南流經鞏昌府西和縣折東南流至階州成縣南合濁水爲白水江又東南至略陽縣北合發源秦嶺之故道水始稱嘉陵江南流至州北偏西百七十里白雀寺入境繞賈家坪流溪溝二牌至徐家壩牌之黑水口黑水河自蟠豕西發源西南流經東皇溝抄紙衙合鞏家河至徐家壩合南沙河西流來注之復南流至陽平關東折西流板踏河自沙河牌之夏家坡發源西北流合沙河水經三道河牌來注之又西流至關下韓家河自大竹壩東南甯江寨發源西北流經三道河西來注之又西至陳家壩清河自金城山發源西南流經上清河下清河二牌來注之又西至燕子河自階州岸門口發源西南流至青崗坪東北入境南流來注之又西過金山之東麗折南流經木槽溝至青灘廟又南繞大竹壩之西至州西百二十里蔡白灘出境入四川廣元縣界約行境內百八十里水量頗大流亦平緩載重

數噸以下之小船全年俱可行駛夏季尤暢行無阻並可上溯至略陽縣水運之便爲州境第一惟青灘廟左近江口心有石激流不平（西流河）即古寒水發源州東南百七十里西流河牌之寒山自山畔七眼泉湧出合流西北經元壩子折西南流經二郎壩至毛壩河東北入廟河自山南發源西流經紙廠河來注之又西南流至麻線灘出境入四川廣元縣界約行境內百餘里大概行山峽中水流激湍不便舟楫下流由東河入嘉陵江（安樂河）發源階州梅子園東南流爲陽壩河自州西偏北百六十里入海河牌之東北入境爲入海河折西南流入安樂河牌爲安樂河至鹽茶關之東作一大曲折復南流至州西二百里仙山觀之西折東南流出境入四川廣元縣界約行境內八十里自入海河以下俱可行筏下流直入嘉陵江（廣平河）發源階州文縣大盤谷東南流爲五馬河自州西偏北二百四十里青木川牌之東北入境經魚筌壩葉子壩南流至廣平河牌爲廣平河折西流復折南流至州西二百二十里出境入四川廣元縣界約行境內六十里自魚筌壩以下俱可行筏下流直入嘉陵江（青木川）發源階州西

溝堡東南流自州西偏北二百六十里青木川牌之西北入境折南流至柳樹壩折西流至金山寺復折南流至州西二百四十五里出境入四川昭化縣界約行境內五十里不通水運下流由白水入嘉陵江 又有黃塢河發源州南四十五里牢固關西南流經黃塢驛關溝出境入四川廣元縣界約行境內三十里全無水運下流直入嘉陵江

以上諸水可爲水系表以明之



青木川

白水


道路

本境地鄰三省道路四通共分五大幹（一）出城過玉帶河西南行十里七里塢又十里界牌又十里迴水河又十里牢固關逾關而西十里黃塢驛又十五里接官亭又五里七盤關出境接四川廣元縣校場壩爲州南通行之驛路（一）出城過玉帶河東北行十里柳樹店又十里五里坡又十里滴水舖又五里猪市街左分一支西北行逾陡嘴子梁十五里至南沙河又二十里至戴家壩自戴家壩又分三支（一）東北逾分水嶺三十里至烈金壩（一）西逾朱家壩四十里至陽平關（一）北逾捷山四十里至鞏家河又四十里至二郎壩與略陽縣接官亭路接其幹路則自猪市街東北行十里逾五丁關又十五里寬川舖又十五里斬龍壩又十里烈金壩與戴家壩東北來之支路會折東行十里至大安鎮有支路自略陽縣廟壩東南行十里經鐵佛寺又二十里經黃銅舖又二十里至鎮左與本路會又東行十里桑樹灣又十里至金碓舖出境接沔縣青羊驛爲州


北通行之驛路（一）出城過玉帶河西北行二十里夏家坡又二十里舒家壩又十五里鄭家壩又十五里新店子又二十里陽平關與戴家壩西來之支路會折西行十五里唐家渡過嘉陵江北西行十五里刀碛壩又西南行十里燕子礪又十里七道水又十里邵家壩又十里分水嶺復折西行十里安樂河又十里逾鹽茶關至竹林壩又十里至廣平河分二支（一）西南行十五里水觀音又十里柳樹壩又五里駱家嘴又五里龍神廟又十里金山寺又五里出境接四川昭化縣椒子口路（一）西北行十五里穿心店又二十里魚筌壩折西行四十里青木川又五里至分水嶺出境為四川平武縣及階州文縣入陝之要道（一）出城過玉帶河東行十里李湖灘又十里高寨子又十里戚家壩又十里蔡家壩折東北行十里至鐵鎖關分三支（一）自關東南行經襄山溝四十里至板倉壩又分二支左經周家營四十里至元壩子通南鄭縣鋼廠右經大沙河六十里至梨坪通四川南江縣後壩（一）自關東行逾潔山三十里至三陽壩又四十里至老龍祠通沔縣阜川（一）自關東北行十五里馮家嘴又十五里平溪河

又二十里胡家壩折東行十里老代壩又十里至黃土嶺接沔縣境為赴府城之小路（一）出城南行十里後河壩又十里錢家梁又十五里逾南山至秦家壩又十五里毛坪溝又十里逾照壁山折東南行十里關口壩又五里至胥家壩接四川廣元縣兩河口路

以上各路可為路系表以明之



表



物產

本境地勢高寒土性礮礮于產物既不甚相宜兼之工藝未興貨多棄地故天然產與製造產並為絀少舉其稍著者植物以林產為主有松杉漆竹等類橡樹尤多西部一帶盛產木耳又有核桃柿餅及藥品類之柴胡泡參薑薄杏仁五倍子等並運出境惜不能成大宗農產有米麥玉蜀黍豆類芋類以玉蜀黍為多其餘亦俱敷本境之用近因改種鴉片食物甚為減少動物則家畜牛羊雞犬豕及馬類俱有但未蕃殖野產麂鹿雉兔並為有益人生之品又產蜡虫山蠶一物舊屬特產近則此業已衰礦產除西部之大小金山外全未發現惟東部有燧石礦其

質出火且可為玻璃之原料石材甚富所在多有嘉陵江畔之文石尤著名製造一門無足述者祇有少數之木工製成木器行銷本境而已餘既限于地勢亦不講製造之法雖有原料皆敝蕪棄之民生所以日蹙也茲將所有各產表列于左

種類	天然產		製造產	
	大宗	常	特	大宗
動物				
鳥	雞	鴨	鳧	雉
獸	豕	牛	馬	驢
水族		魚	鯨	鱔
虫		蜜	蜂	蠶
植物				
木	松	杉	柏	桐
穀	稻	糯	粱	大
	玉	蜀	黍	麥
	燕	麥	燕	麥
	香	稻		
	漆			
	糖	食		
	米	葉		

豆	黃豆	小豆 菜豆 蠶豆 扁豆							
蔬	木耳 黃花	瓜類 菌類 筍 蒲筍 椒 羅 葡 胡 羅 葡 羊 芋 山 藥	銀 木 耳 香 菌						豆 餅
果	核 桃 柿 杏	桃 李 梨 栗 枇 杷 橘 柑 櫻 棗	柿 餅						蘇 粉
藥	柴 胡 薑 薄 參 泡	杏 仁 五 倍 子 銀 花 黃 藥 黃 精 車 前 子 天 麻 大 力 子							
礦 物									
金			金 砂 金						
石	石 板 石	石 灰 石	文 石 燧 石						

商務

本境僻處山陬交通滯礙又不知整頓土產以擴利源故商務甚為失敗就現在情形計之各項土貨內銷之數除鴉片一項歲約三萬兩餘皆零星細碎不足計數即木耳為土產一大宗每歲由陸運至府城者不過二千包由水運至四川者不過千餘包他如桃餅及葯材等項歲由水運至川多則數百包少或數十包不
等外銷之數亦僅如斯至外來諸貨則充斥境內尤以四川之鹽湖北之布為大

宗鹽自廣元入境水陸兼運陸運至城轉銷高寨子胡家壩一帶歲約在千包以上水運至陽平關轉銷戴家壩大安鎮及府城一帶歲約在五千包以上布之銷數合城內及各鄉鎮計算歲不下四千捆皆自城固縣陸運入境分售各處而本境織紡之風幾于絕迹又有棉菸糖油紙料各品亦皆自他境運入由外商主持土著安得不病茲將本境商務細目表列于左

產地	貨目	銷路							銷數
		本城	高寨子	胡家壩	陽平關	戴家壩	大安鎮	漢中府	
本境	木耳							二千包	四川廣元縣
北路	柴胡							五百包	
西路	薑薄							三百包	
西路	泡參							三百包	
西路	杏仁							百包	
西路	五倍子							百包	

漢中	甘肅	甘肅	湖北	四川	四川	他境	南路	東南路	中東路	西路	北路	北路
油	酒	菸草	布	糖	鹽		漆	黃花	土藥	絲	柿餅	核桃
一萬斤	三千斤	一千斤	一千捆	一千斤	五百包				一萬二千兩			
	一千斤	五百斤	一千捆	一千斤	五百包				一萬八千兩			
			五百捆		五百包							
	二千斤	一千斤	五百捆	一千斤	五百包							
			一千捆		三百包							
	一千斤	五百斤	一千捆		五百包							
					三千包							
							一千斤	五百包			五百斤	五百包

漢中	四川漢中	略陽	紙	茶	一千斤	五百斤			五百斤		五百斤	
			二千捆		一千捆				一千捆		一千五	
											百捆	

